

## Сийрат дарслари (10-дарс)



СИЙРАТ

дарслари 10-дарс

ISLOM.UZ

Сийрат дарслари Шайх Муҳаммад Содиқ Муҳаммад Юсуф роҳимаҳуллоҳнинг «Бу – Расулуллоҳ соллаллоҳу алайҳи васаллам» таржима китоблари ва “Ҳадис ва ҳаёт”нинг 19-жузъи асосида бериб борилади. Мавзуларнинг тўлиқ матни билан танишиш учун китобнинг ўзига мурожаат этиш тавсия этилади.

17:07 / 07.12.2018 5299

\* \* \*

66. Ибн Аббос розияллоҳу анҳумодан ривоят қилинади:

«Расулуллоҳ соллаллоҳу алайҳи васаллам билан бирга мен ва Холид ибн Валид Маймунанинг олдига кирдик. У бизга бир идишда сут келтирди. Шунда Расулуллоҳ соллаллоҳу алайҳи васаллам ичдилар. Мен ўнг тарафларида эдим, Холид чап тарафларида эди. У зот менга: **«Ичиш (навбати) сеники. Истасанг, уни Холидга берасан»**, дедилар. «Сиздан қолган (сувни) ҳеч кимга бермайман», дедим.

Сўнг Расулуллоҳ соллаллоҳу алайҳи васаллам: **«Кимни Аллоҳ таом билан таомлантирса, «Аллоҳим, бизга уни баракали қилгин», десин. Кимни Аллоҳ азза ва жалла сероб қилса, «Аллоҳим, бизга уни баракали ва зиёда қилгин», десин»**, дедилар. Ва Расулуллоҳ соллаллоҳу алайҳи васаллам: **«Сутдан бошқа таом ва шароб ўрнини босувчи нарса йўқ»**, дедилар».

*Абу Довуд, Термизий ва Ибн Можа ривоят қилишган.*

\* \* \*

67. Абдуллоҳ ибн Жаъфар розияллоҳу анҳудан ривоят қилинади:

«Расулуллоҳ соллаллоҳу алайҳи васалламнинг таррани ҳўл хурмо билан тановул қилаётганларини кўрдим».

*Бухорий ва Муслим ривоят қилишган.*

\* \* \*

68. Оиша розияллоҳу анҳодан ривоят қилинади:

«Набий соллаллоҳу алайҳи васаллам қовунни ҳўл хурмо билан ер эдилар».

*Абу Довуд, Термизий ва Ибн Ҳиббон ривоят қилишган.*

69. Анас ибн Молик розияллоҳу анҳудан ривоят қилинади:

«У Набий соллаллоҳу алайҳи васалламга арпа нон ва таъми ўзгариб кетган хўрак олиб борди. Набий соллаллоҳу алайҳи васаллам Мадинада совутларини бир яҳудийга гаровга бериб, шунга аҳллари учун арпа олган эдилар. У зотнинг: **«Оли Муҳаммад соллаллоҳу алайҳи васалламнинг ҳузурда бир соъ буғдой ва бир соъ дон бўлмаган»**, деганларини эшитдим. У зотнинг ҳузурларида тўққиз аёл бор эди».

*Бухорий ривоят қилган.*

\* \* \*

70. Абу Жуҳайфа розияллоҳу анҳудан ривоят қилинади:

«Расулуллоҳ соллаллоҳу алайҳи васаллам: **«Мен ёнбошлаган ҳолимда (таом) емайман»**, дедилар».

*Бухорий ривоят қилган.*

\* \* \*

71. Жобир ибн Самура розияллоҳу анҳудан ривоят қилинади:

«Набий соллаллоҳу алайҳи васалламни чап тарафларидаги болишга ёнбошлаган ҳолларида кўрдим».

*Абу Довуд, Термизий ва Ибн Ҳиббон ривоят қилишган.*

\* \* \*

72. Абу Ҳурайра розияллоҳу анҳудан ривоят қилинади:

«Расулуллоҳ соллаллоҳу алайҳи васаллам ғалла уюми олдидан ўтдилар. У зот қўлларини тиксалар, панжалари ҳўлга тегди. Шунда у зот: **«Эй ғалла эгаси! Бу нимаси?»** дедилар. «Ёмғир теккан эди, эй Аллоҳнинг Расули», деди. **«Бунни одамлар кўриши учун ғалланинг устига қилсанг бўлмасмиди! Ким алдаса, мендан эмас!»** дедилар».

*Муслим ривоят қилган.*

\* \* \*

73. Абу Ҳурайра розияллоҳу анҳудан ривоят қилинади:

«Бир одам Набий соллаллоҳу алайҳи васалламдан қарзини сўраб келди ва қўполлик қилди. Саҳобалар унга (ёмонлик) қасд қилиб қолишди. Шунда Расулуллоҳ соллаллоҳу алайҳи васаллам: **«Уни тек қўйинглар. Ҳақ эгасининг ўз гапи бўлади. Унга (туяси) ёшидагисини беринглар»**, дедилар. Улар: «Биз унинг (туяси) ёшидагисининг яхшироғидан бошқани топа олмаяпмиз», дейишди. **«Ўшани беринглар. Албатта, сизнинг яхшиларингиз қарзини гўзал адо этувчиларингиздир»**, дедилар».

*Бухорий ва Муслим ривоят қилишган.*

74. Анас ибн Молик розияллоҳу анҳудан ривоят қилинади:

«Набий соллаллоҳу алайҳи васаллам: **«Осонлаштиринглар, қийинлаштирманглар, севинтиринглар, нафрат қилдирманглар»**, дедилар».

*Бухорий ва Муслим ривоят қилишган.*

\* \* \*

75. Оиша розияллоҳу анҳудан ривоят қилинади:

«Расулуллоҳ соллаллоҳу алайҳи васаллам икки ишдан бирини ихтиёр қиладиган бўлсалару, улардан бири бошқасидан енгилроқ бўлса, агар гуноҳ бўлмаса, албатта, енгилини ихтиёр қилар эдилар. Агар гуноҳ бўлса, ундан энг узоқдаги одам бўлар эдилар. Расулуллоҳ соллаллоҳу алайҳи васаллам ўзлари учун интиқом олган эмаслар. Фақат Аллоҳ азза ва жалланинг тақиқлари поймол қилинсагина, (интиқом) олардилар».

*Бухорий ва Муслим ривоят қилишган.*